

Bingzsiengz Hai Ban Yenzdauj “Gyaak Cingsaenz Minzcuz Doxgiet, Gyonjcomz Rengzmbwk Guhhoengh Lajmbanj”

凭祥举办“加强民族团结精神, 汇聚乡村振兴的磅礴力量”研讨班

Vih caiq haeujlaeg hagsib roxyiuj gij swhsiengj youqgaenj Siz Ginbingz cungsiuhgi gvendaengz gyaak caeuq gaijndei hong minzcuz, dem'ak minzcuz doxgiet, cienzboq rengzcingq, doidoengh dieg henzguck hwngfat ndaej cizlieng sang, mboengqneix, Bingzsiengz Si hai aen ban yenzdauj “gyaak cingsaenz minzcuz doxgiet, gyonjcomz rengzmbwk guhhoengh lajmbanj”, iu le doengh boux conghyah Swcigih Segohlengz hawj gyoengqvunz hwnjdangz. Aen ban neix gangj le gij iugouz moq、diuzrap moq gvendaengz minzcuz doxgiet laeng seizdaih moq、fatyiengz cingsaenz minzcuz dwg gij rengz goek guhhoengh lajmbanj、baenzlawz aeu fatyiengz cingsaenz minzcuz doxgiet bae doidoengh lajmbanj Bingzsiengz saenqhwng daengj. Daihgya doxyau hagsib le, engq roxyiuj cukmaenh gij eiqsik caezcaemh Cunghvaz Minzcuz dwg baenzlawz youqgaenj de, engq roxyinh aeu rap ndei diuzrap guh ndei hong cauhlaeb minzcuz doxgiet baenaj, haeujlaeg hagsib doxgiet gak minzcuz beixnuengx bae doidoengh guhhoengh lajmbanj dwg gij hong Swcigih Dangiveij、Cwngfuj seizneix、baezlaeng cungj youqgaenj ndeu, dwg gij hong Gvangjsih hwngfat raiz bien moq aeu guh ndei de. Gyoengqvunz naeuz baezlaeng aeu guh ndei hong swhgeij, guhsaed guhcaen, guh ndei hong minzcuz seizdaih moq Bingzsiengz, caez okrenz coicaenh minzcuz doxgiet.

(Lij Fung / 吕凤)

Yungzanh:Cigboq Gai Huq Guh Ndaej Hoengh

融安：直播带货热火朝天

10 nyied 22 hauh, youq Yungzanh Yen Yungzgangh Segih, dah cujboh Bouxcuengh cingq youq gwnz muengx cigboq gai gij huqdoj Yungzanh. Mboengqneix, gyoengq cujboh Yungzanh Yen cungj nyaengq youq Doujyinh、Vaiqsouj daengj lai aen bingzdaiz cigboq gai huq, coh daengx guek lwgminz doisiu gij doxgaiq yienh de, doengh gij huqdoj dieg de bienqbaenz aenaen dinghdan bae daengz daengx guek gak dieg. Daengz seizneix, Yungzanh gaenq miz 749 aen gizez guh densangh, gak cungj bouq gwnz muengx miz 23251 aen. Bi 2016 daengz bi 2020, yienh de denswj sanghvu ngaenz gaicawx cungj gungh mauhgvaq 133 ik maenz, daiqdoengh 7 fanh vunz baedauq couhnieb cauhnieb, ndaej demsou 5.6 ik maenz, gyamaenh gij hongbaenz gunggeng duetgungz, coengh rengz lajmbanj hwnghoengh.

(Veiz Yungzinh / 韦荣军)

► Dah cujboh Bouxcuengh cingq gai huq.



Gojgaeq Iq Gvendaengz Minzcuz Doxgiet Baenaj Gvangjsih

广西民族团结进步小故事

Roek Cuz Doengzsim Caez Guh Mbanj Moq

六族同心 共建新村

Gvangjsih gak minzcuz “lumj ranz caen ndeu, gvanhaeh minzcuz gig huzndei”, neix dwg aenvih cien bak bi doxdaeuj Bouxcuengh、Bouxgun、Yauzcuz、Myauzcuz daengj gak minzcuz beixnuengx laebdaeb doxyau doxyungz doxndei.

Doxgingq doxbang lumj ranz caen ndeu yienh'ok le gij yienghceij gvanhaeh minzcuz Gvangjsih caencingq daeuj. Vanzgyangh Mauznanzcuz Swciyen Swh'wnh Cin Mbanjcinzsangh dwg aen mbanj vunzsenj hung ndeu, miz Bouxcuengh、Bouxgun、Mauznanzcuz、Myauzcuz、Yauzcuz、Suijcz daengj roek aen minzcuz comzyouq, caen daedbied raeuh.

Ciengzgeiz doxdaeuj, mbanj de aeu caez guenj saeh ndaw mbanj coicaenh hwnqguh aenmbanj vwnzmingz; doxcaez swnghcanj coicaenh gijndei swhyenz doxbouj; doxcaeuq biujyienj cezmuz coicaenh minzcuz yungzhab; doxbang doxbaengh aeu bawx haq sau, coicaenh lwglan seiqdaih huzndei; itheij guenj gij ancienz ndaw mbanj coicaenh seiqhenz doxhuz; caez cauh binjbaiz coicaenh vwnzva minzcuz ciepcienz hwngfat daengj gij fuengfap “roek lienz roek coi” bae guhhong. Neix hawj hongsaeh minzcuz doxgiet baenaj hwngfat engq rengz, raizok hot fwen minzcuz doxgiet、doxhuz comzyouq ndeu.

Miz gij cwngcwz minzcuz aendangj caeuq guekgya dazyinx, Mbanjcinzsangh gaenxmaenx camgya gij hozdung cauhlaeb minzcuz doxgiet baenaj, gaenq baez di hwnq baenz aen mbanj miz gij daegsaek siujsoq minzcuz ndeu, mbanj de ranzyouq miz daegsaek、canjnieb daemxcengj miz-rengz、vwnzva minzcuz naekna、seiqhenz vunz youq gyaundeix、gvanhaeh minzcuz huzndei, caez raizok bien moq guh minzcuz doxgiet baenaj. Bi 2014, Swcigih Dangiveij、Yinzminz Cwngfuj bingz mbanj de guh “Aen Mbanj Yienghbanj Guh Minzcuz Doxgiet Baenaj Swcigih”, bi 2017 Guekgya Minzveij heuh mbanj de guh “Aen Mbanj Miz Gij Daegsaek Siujsoq Minzcuz Cungguek”.

(Gvangjsih Minzcuz Yenzgiu Cunghsinh hawj gauj)

Aeu “Bujfaz + Cienzciep” Coi Minzcuz Doxgiet

以“普法+传承”促民族团结

Vih cukmaenh gij eiqsik caezcaemh Cunghvaz Minzcuz, coicaenh minzcuz doxgiet baenaj, mboengqneix, “Mungz Genj Lwnh Fap” aen doih Mungzsanh Yen Genjcaz Yen bae daengz Cangzbingz Yauzcuz Yangh guh hozdung lwnhgangj cihsiz faplwd, caemhcai q hag gij dinfwngz guh siuqva Yauzcuz, guh yienghneix bae coicaenh minzcuz doxgiet. Gyawj geij bi neix, yienh de youq dingbanhsaeh hai aen cueng banh saeh cienmonz hawj vunzlai siujsoq minzcuz, laeb le aen doih siujsoq minzcuz genjcaz fuzvu, daengz gak yanghcin、gak mbanj、gak hagdangz bae lwnhgangj bujgiz faplwd, caemhcai q haivat caeuq hoh ndei gij vwnzva gwnz biengz dem.

(Veiz Yabungz Couh Bungz / 韦亚鹏 周鹏)

